

Amore mortore

Menzione Speciale Premio poesia "Remundu Piras" Villanova Monteleone 31 agosto 2013

Faghe che sende in bestes de pintore,
setzidu, assusseghadu, a sinnu sanu,
cun su pinzellu chi t'intrat in manu,
miscia cun dengu e garbu su colore
e pinta in su quadru 'e valore,
istiu, atunzu, ierru e beranu.

Unu mannuju'e linu mazadu
in rosales de punnas fioridas
campuras de ispigas ingranidas,
chi abbian de vida su cunzadu.
E in sa mesa su pastu abbunzadu;
càvanos chi si cuan sas feridas.

Bruiana sas caldanas de s'istiu.
Sa paghe 'e domo, sa fide bramada,
s'amore e-i sas grascias de s'amada
tue atrotzas cun su poderiu,
che sutta a pedra in siccagna de riu,
tenes a ciaffu in cara addolimada.

Sos sinnos auppados, sos cabijos
chi isprican che budrones de sa ua,
cussa dode licantza est cosa sua
e tue dias cherrer, che bortijos,
falet subr'abba in pescias de addijos
e in trainos de fele e de lua.

S'atunzu acherat chintales grisados
e fozas grogas ruende selenas,
su ligàtzulu astrintu 'e sas cadenas.
Sos disizos in coro trippiados,
dai su malu fadu assannigados
chi trappat fintzas s'ossu in sas carenas.

In nottes atturadas de ierru,
filas sos muscios de anneu a annangher,
non ti premuras sa vilesa a frangher.
Intras ispidos de fogu e de ferru
a chie ispijat penas de inferru
in sos ojos istraccos de piangher.

Cussu possu s'ènit dai deris
e lu giughes fieru in cussa 'ia,
ùnchina e mànchina cun marrania
amorada e muzere a morte feris.
E t'accunortas sos bratzos ch'abberis
cun sa meschinidade 'e ominia.

Lea s'impudu cun ambas sas manos
a fagher de amore una pintura
de 'asos e carignos s'ermosura.
Cun tottu sos colores chi in beranos
isprammet in sos chelos solianos
cun seru su rispettu 'e sa natura.

Aeras rujas de mare

1° Premio Sezione A - Poesia in Rima (In memoria di Cicito Canu) - XXVII Concorso di Poesia Sarda CREI - ACLI -- Chiaramonti 2015

Aeras rujas de mare
abbiat su muttu antigu,
prò semenare su trigu
massajos a laurare.

Dag'has s'incunza cumprida,
fattu su fittu 'e sa linna,
sos boes in s'alapinna,
remuzan proenda e sida.
Pro chi in campuras de vida
aidattone umpare
in sas cussorzas - che pare -,
crescan de crias sos mantos
e in chelos a isphantos
aeras rujas de mare.

Chittulianu a su friscu
comintzas sas pulisias
de prunitzas e tirias,
ruos cun su briu aniscu,
pane sutta su suiscu
ismurzas aunz'a figu
brujende a lenu s'intrigu
sutta in cheas de carvone,
massarias e narvone
abbiat su muttu antigu.

A passos in su 'arvatu
intro sa tula sestada
est a comintzos s'annada
cun atzas e arramatu
giughene s'erpitze fattu
chi iscristat sa terra azigu,
peri su tempus amigu,
sos boes in sas cameddas
e chie sas bertuleddas
a semenare su trigu.

Birdes cunzados e tancas
tottu in bestes de laore,
manzaniles de lentore
isfunan grinas biancas,
a be-i imbegher sas francas
sedes a irranulare
arzolas a bentulare
fintza a su ruju'e su sero,
torren atzudos, ispero,
massajos a laurare.

Dai chentu camineras

Menzione particolare a Burgos - 2^a edizione Premio Adelasia di Torres

Benit dai chentu e pius camineras
melodiosa sa sarda cantone
cumposta in versos de chentu maneras

che faineri in mànigas de 'entone,
cun su sentidu, mùsicu e cantore
cosin in rima ogni chistione

si han su coro sididu 'e amore
làgrimas caldas lis falat in chizos
ingullende salia 'e rantzigore.

Paret ch'han un'a s'àter'assimizos
s'est chi sas sortes si chintan de dramas
e-i sas feridas no han allibizos.

Belu 'e disisperu 'ettan sas amas
da' intro su pasciale in sa tanchitta
ch'ispiridende sun tottu sas bramas.

Su fragellu 'e sa limba biaitta
chi che 'occhit s'arvegh'in sa raina
chen'ispidu 'e fogu e leppa fritta,

in sos porchiles sa peste suina
e intro su 'acchile ruet s' 'acca,
su 'inu buluzadu in sa chentina.

Ma intrat s'atza in sa caren'istracca
a su cantu 'e su puddu a manzanile
a dar'interru a malattia macca,

imbrajada 'e fogu in su foghile,
chitto pistende su pan'untinadu
cando sas grinias trappan su giannile.

Muntu in sa mandra est già su madrigadu
e peri sas costeras sa laghinza,
in sas labias su latte giagadu.

Isbarratzadu ch'hamus runza e tinza
torrat su bon'umor'e-i s'allegria
ciulan sos puzones in sa 'inza.

Pigan Cubeddu, Murenu e Caria
a festa manna 'e su santu patronu
e intriscan sa gala 'e poesia

accumpagnados dai su cunsonu

lestra che 'oghan s'intragna guvarda
altziend'una tatza 'e 'inu 'onu,

in istios chi siccan sa prunarda,
in anderas de paza in sas aeras
melodiosa sa cantone sarda

ch' 'enit dai chentu e pius camineras.

Farfaruzas de poesia

XXI edizione del Premio Letterario "Nanneddu Chighine" – Ittireddu 2011
Menzione d'onore

Cando mi ponzo in pijia e m'atrinzo
a cojiuare in rimas sas peràulas,
non cherzo e ne hapo 'e narrer fàulas
e a cumponner versu in poesia
ca so in duda si est arte mia
no isco mancu da 'ue cominzo.

Sa frebbighedda lena chi hap'atzesa
a boltas bisat e m'intrat in gana
cucuriola musa mesulana
chena cabu, ne sestu, ne misura
ch'hat a èsser macchine chena cura
chi pitzigadu si m'est a betzesa.

Fintzas in sònrios mi so 'isadu
ondras e bantos d'haer in piusu
e inzomende su filadu in fusu
pro tessidos in tramas puntigliosas,
che recamu 'e pignos de isposas
de èsser a poete graduadu.

Ma che ùmile anzon' 'e naschimentu
m'andat chi m'hapant in su cunsideru
cussos chi suni poetes abberu
e a grandesa los bestin sos pannos
fatend' inghiriolu cun sos mannos
sos mios sunt tessinzos de appentu.

Che lepereddu in s'àrdia currende
in fiottu 'e caddos curridores
a sa briglia 'e fantinos binchidores
lestru da-i s'appéttigu m'iscanto
poi mi ghindo e riende m'ispanto,
cantu piùbere semus pesende.

A bois ch'hazis sa dode e-i su donu
ch'a versu isoltu, a cantone rimada
baltziades sa sarda faeddada
pius in altu pro lomper'attesu
da-i Campidanu a su logudoresu
dulche e piagherosu unu cunsonu.

Deo isculto cagliadu a sa muda
de càntigos accòglio sas chimuzas
e cando rùene sas farfaruzas
a chie columadu hat sos mojos
e a sabiesa 'e mastros muraiolos,
nessi bi porro sa pedra minuda.

In sa tanca a betzesa

1° premio - Villanova Monteleone 2010 - 19^a edizione Premio di Poesia Sarda "Remundu Piras"

Una carruba a s'intrada,
de laros una chesura,
ruos nieddos de mura,
intro sa tanca serrada.

Ue isfunan sos ammentos
in s'arzola 'e sos sentidos,
curren che caddos fuidos
sempr'aniscos sos intentos
innaigados da' 'entos
ma cun sa 'oza isfrenada
de cherrer birde torrada
in muttos de anninnia
s' 'arigada pitzinnia
che-i sa carruba a s'intrada.

E-i sos chiscios allenas,
chingias, loros e binchizas
in sos meledos a mizas
isolves sas cantilenas,
a tonu musas selenas,
gosu sonniadu a fura,
cun sa sorte in bona ura,
in sas fatzendas lezeras
che neulas passizeras
de laros in sa chesura.

E a discansu ti pasas,
friscu in umbras de sauccu
inue cantat su cuccu
ch'abisat sas cariasas,
daboi mutzas e rasas
sarmentos a pudadura
pro chi amprosa e madura
crescat in sa 'inza tua
dulche e bundante sa ua
che in sos ruos sa mura.

Com'has sos chertos sensados
ma sempre 'ios sos bisos
in beranos de accisos,
miràculos accansados,
disizos meda pensados
peri sa tula criada
pustis sa paza 'entulada,
sobran su trigu a muntones,
isettu e ambissiones
intro sa tanca serrada.

Luna amorosa

Menzione d'onore al Concorso di Poesia Sarda CREI – ACLI Sardegna 2009

Tunda amorosa ses luna piena
cando ti pesas a s'iscurigada
e pinturas s'aera imprateada
totta 'e ammajos sa notte serena
e accarignas sos coros in pena
chi sun attesu a sa pessone amada.

Tue s'iscuru l'allughes a die
abbàidas in terra sos amantes
nara si 'ides sos ojos sonniantes
chi s'ispijan abbaidente a tie
cun oriolos sun pensende a mie
in s'ànima e in coro palpitantes.

Gai sobrastas s'abba e-i su 'entu
e de logores nd'isprammas a rios,
cand'est s'amada mia in bratzos mios
tando dicioza ti faghes d'arghentu,
orizas de amore ogni mamentu
e-i sas penas aunzas de brios.

Cando s'atopan su pensu e-i su pensu
su meu cun su tou; sos faeddos
afaca a tie s'atzenden isteddos
ch'indeoradu lu tinghen s'immensu
e tottu sos sentidos de su sensu
pro su coju ammanitzan sos aneddos.

E deo leo e nde sèbero duos
e donu a giambu nde fatto a s'isposa
sa chi m'hat dadu sa prus bella cosa,
mere 'e s'amore e de sos basos suos
m'ha fattu e rupo in majones de ruos,
boddò e li ponzo in pettus una rosa.

Ispadriende in sa notte arcana
bolas cun possa 'e alas de astore,
che mariposa in fiore, in fiore
si puru pisigula e ruffiana
torra crasa bianca e risulana
e alluma su ruju immensu amore.

Sa 'oghe de su mudine

Premio Speciale Poesia Tradizionale - 6° Premio di Poesia Sarda 2a e 3a Circostrizione –
Comune di Sassari

Si haisti una 'oghe a l'alziare,
a la pesare a bentos che chijinas
chi si falen in terras annijinas
a franca abberta a be-i semenare
su cherrer bene, s'amore e s'amare
pro chi fuat su male a perdijinas.

Tue ch'in coro in sos tempos inserras
uras de malu fadu e tribulias,
murrunzos chena seru e balentias,
chiettas possa manna e no inzerras
iscabadas isentas cuntierras
ca ses pro paghe e bene in rialias.

E in su pensu in sentidos funguttos
che ghindalos ti ghindan sos forrojos
e a risu segadu, isfustu in ojos
has incunzadu dolores e luttos
a cantilena sos matessi muttos
pro segare trobeas e trobojos.

Giughe sas rughes chi t'han postu a palas
cun sos framengos chi has in meledu
dadu chi dodes no has in eredu
ma de piantu sas baddes chi falas
a tie chi mutzadu coa e alas
t'han e cagliadu ti tenen masedu.

Sa 'oghe chi no has e tias cherrer
chi fintza a oe t'est arressa in bula,
intra la che arados in sa tula
sos beraniles a sulcos abberrer
innida e bia attesu a che ferrer
a sos masones paschende in s'istula.

Pone s'atza rebelle totta incrine,
campanas e matraccas a tzocheddos
cun son mürinos frades e nieddos;
faghide a fischinidas su mudine
e in sos biradolzos chena fine
chi bos torret sa 'oghe e sos faeddos.

A sos chi 'ettan lua e abba cralta,
càrian sos isciaos in runzones
in sos mares, in padros e chizones,
a lis narrer bazide a boghe alta
chi sensen a sa terra 'e fagher falta
e tòrrene masedos che anzones.

S'Itàlia unida

Menzione d'onore al XXIII Concorso di Poesia Sarda CREI – ACLI Sardegna
Sezione D: premio FAP – ACLI

Bird' 'e isperas bias e ammajos,
biancu nidu téssidu in sa tela,
ruju 'e sàmbene peri sa carrela
chi untinadu han babbos e jajos.

In rudes cuntierras che massajos
e marineris ch'altzian sa vela,
pinta de tres colores sa bandela
chi de logores ispramat a rajos.

Has in sos montes nies de ierru,
de mùnicos cantores ses funtana,
sos fizos malos ch'has postu in s'inferru.

Bantu 'e sa nassione italiana,
arte e trabàgliu cun coro e ferru
de donnosmannos chi unidu t'hana

E ti sobran de lughe soliana
sos caros frades ch'han fattu disterru.

Sónniu a oju abbertu

Ozieri - Premio Logudoro 2011 - Menzione d'onore

Unu sónniu fissu
in bisu a oju abbertu
mi frundat attraessos in su pensu.
E mi ponzo cun issu
umpare a fagher chertu
che isteddos chi rujana s'immensu.
Camineras de luna,
biazos de fortuna
e sabiesa chi ammeras su sensu.
A sa 'essida 'e sa missa
fattende che minetta ogni prommissa.

In rujores de mare,
chintale indeoradu
cando sa die che 'oltat cudd'ala.
Massaju a laurare
ammanitzat s'aradu,
pan'e aunzu in sa bértul'a pala.
In su fagher laorzu
creschet su 'iradorzu
in sas fainas a su piga-fala.
E in sas semeneras
anninnias de vida e de isperas.

Movet chittulianu
ch'ancora s'astraore
est che velu biancu in sa campagna.
Mintet cun apra manu
semenende laore
tottu sas bonas uras de s'intragna.
In sa tula medida
bunda ispiga ingranida
non la mujan traschia ne siccagna.
E triulad'in tundu
allèbiat su fàmine' 'e su mundu.

Da-i chelos lughentes
de nues chen'umbraghe
rajos de sole ispàdrian a rios.
In sònrios sas zentes
bisan amore e paghe
chi sun accisu 'e sos ammajos mios.
De 'ighinu e attesu,
a s'ùmile e offesu
e affrigid'in coro a dare brios.
M'imbrancono a disora
a oju abbertu sonniende ancora.

Una rosa segada

2° premio al Concorso di Poesia Sarda CREI – ACLI Sardegna 2010

a Luisa Melone

Cando su primu risu iscantzat laras
assaborende sos primmos carignos
sas bideas chi sestan sos dissignos,
già in burdones su trigu in sa tula
a tie t'intrat su ràntzigu in bula
e giughes dolu a sas persones caras.

Crua l'has intoppada cussa sorte
umpare a malu fadu e oju feu,
sos ch'in s'ànima tua han postu neu
appen'intrende a pàschiere in sa tanca
e trobeidu anzonedda bianca
e ses andada isposa cun sa morte.

Proite fiza cara e istimada
no has leadu sas penas a chìrriu
a bentulare altu unu ticchìrriu
pro narrer su ch' in coro haisti a pesu
e nois surdos non t'hamus cumpresu
e t'allibizas che rosa segada.

In caltzoneddos e zàinu a palas,
pitzinna 'e "scout" in sa compagnia,
cun su coro pienu 'e allegria,
in padros birdes cun su sole in chizos,
bramas ninnende e sònrios che fijos
in bolu 'e columba aberta in alas.

Intro sos coros bonos custoida
ti giughimus pro sempre che tesoro,
che pignu raru in calàscios de oro
a bratzos altos in chirca 'e brios
làgrimas bundas chi falan a rios
ca troppu lestra lassadu has sa vida.

Ma subra a nois isteddu lughente
s'atzendet nou in mesu a s'Udrone
su visu bellu 'e Luisa Melone
ch'allumat sos manzanos de su crasa
cun sos colores de sa cariasa
chi pro s'eternu aùndana sa mente.

Su 'irde 'e sas isperas in fiore
e a fogu tentu su ruju 'e s'amore.

Vintitres de Triulas 2009 (*Pro no immentigare*)

2° premio - Villanova Monteleone 2012 - 21^a edizione Premio di Poesia Sarda "Remundu Piras"

Ispàsimos in campos e costeras,
giutos da-i su 'entu a curridorzas,
inue tiana sas messadorzas
acutas intriscare sas messeras,
limbas de fogu accaddan sas aerassas
ca tue has allummadu sas cussorzas.

Chie t'hat postu in manu s'allumminu
chi hat atzesu vile s'istinchiada?
Giompert fintza a sos oros de sa 'idda,
su fogu dende istragu a su terrinu,
brujat sa lana a masone arveghinu
e li giagat in bucca sa mamida.

S'idet chi a coro giughes unu crastu,
in cabu pensamentos chena seru,
ca ses dannarzu e t'intendes fieru,
a sas fiamas hasa dadu in pastu
montes e baddes a fagher sagrastu
e semenare morte e disisperu.

E bessimu trancuillu a cara alta,
no has caldu ne frittu in su sentidu
a daghi 'ides su logu affiggidu,
ca troppu manna l'has fatta sa falta...
e nara cando a s'Àlvure gualta
be-i torrat puzone a fagher nidu?

Sas costas nudas mustran sas rainas,
sas pedras nettas che in sas pedrajas,
da-i sos littos falados a brajas
bolan in perdisiones sas chijinas,
s'ispantu pibiosu 'e sas ruinas
si perdet in muntones de ghiajas.

Deris, sos frades in Tempiu has mortu,
oe in Mores e Puttumajore,
est sempre 'iu e friet su dolore;
ca suni ruttos chena fagher tortu
e tue curre a runchile isortu
brujende in sa natura ogni fiore.

Hapas impudu de fogos e luas,
peri sas tancas sos dolos carigna,
franghe e revuada s'intragna maligna,
bruttas vilesas ch'asa fattu e cuas
ch'anneu faghene a sas terras tuas
e dólmas in coro 'e sa Sardigna.